

Penduduk kesal tindakan pemaju

Tambak tanah sehingga jejas sistem perparitan



Mustafa menunjukkan ketinggian tanah yang ditambak pihak pemaju melebihi ketinggian pagar kawasan perumahan yang dibimbangi menjejaskan sistem perparitan.

HARIZ AIZAT MAHYUDIN

SHAH ALAM — Penduduk Kampung Sungai Kandis Seksyen 36, di sini kesal dengan tindakan pemaju yang bertindak menambakkan tanah tanpa permit seterusnya mengganggu sistem perparitan.

Tinjauan *Sinar Harian* mendapati, ketinggian struktur tanah yang ditambak setinggi lebih kurang 1.8 meter daripada struktur tanah asal sehingga mengundang kebimbangan penduduk akan berlakunya banjir.

Wakil penduduk, Mustafa Mustakim berkata, dia sekeluarga resah sejak sebulan lalu apabila tanah tersebut dilihat semakin mengelilingi kawasan perumahannya.

"Kalau keliling rumah tinggi, sistem perparitan ditimbus, perumahan kami akan menjadi pulau tidak lama lagi.

“ Kami bimbang sekiranya perkara ini tidak diselesaikan dengan segera, perkara buruk akan berlaku kepada kami pada masa akan datang.”

Mustafa

"Kami bimbang sekiranya perkara ini tidak diselesaikan dengan segera, perkara buruk akan berlaku kepada kami pada masa akan datang," katanya.

Menurutnya, tanah yang ditambak tersebut adalah tanah buangan yang sudah tidak digunakan lagi pemaju dan ditambak tanpa mempunyai permit sah.

Mustafa mendakwa masalah itu

sudah beberapa kali dimaklumkan kepada pemaju dan pihak berkuasa tempatan, namun sehingga kini masalah terbabit terus berlarutan.

Sementara itu, Pengerusi Jawatankuasa Kemajuan dan Keselamatan Kampung (JKKK) Kampung Sungai Kandis, Miswan Salleh berkata, beliau kesal dengan sikap pemaju yang tidak melakukan kerja mereka mengikut prosedur ditetapkan.

"Saya tidak pernah meluluskan pembuangan tanah di kawasan ini, perkara ini sudah dibawa ke Dewan Undangan Negeri (Dun) untuk dibincangkan.

"Jika ingin membina apa-apa sekalipun, infrastruktur seperti perparitan dan jalan perlu diutamakan, jika perkara ini diuruskan dengan baik, tidak akan wujud permasalahan," katanya.